

## Lai petéte fouxe dgerainne

Èl était in còp ènne petéte fouxe dgerainne bin aimabye. Ìn bé maitin c'te petéte fouxe dgerainne trove cìntyè grains de biè ét putôt que de lés maindgie, se bote dains lai tête de lés vengnie.

Po vengnie cés cìntyès grains de biè, èlle aippeule sés tràs aimis, lo boérèt, lo poûe èt lo tchait, po qu'ès v'nieuchint l'édie.

Lés tràs aimis de lai petéte fouxe dgerainne ne poyint pe venis l'édie è vengnie lés cìntyè grains de bié poéche qu'ès étint tus brament otiupaies.

Lo poûe dit : « I airôs bin v'lu, mains i n'é pe finit de maindgie ! »  
Èt è repétchait c'ment èl était veni.

Lo tchait dit : « Ìn âtre còp aivo piaigi, mains li i dait revirie me faire bé ! »  
Èt è repétchait sains brut tchu sés paittes.

Lo boérèt écâquelaie: « Ìmpossibye po moi, i dait vouère lai boère de Jeanne ! »  
Èt è repaît en se balainçaint.

Aidonc lai petéte foux dgerainne s'en vait tot de  
pai lée piaintaie sés cïntyés grains de biè.

Lo temps péssaie èt lés grains de biè grandéchant  
bin.

Bintôt airrive lo môment de lai moûechon, lo  
môment d'allaie soiyie lés grands épis de biè.

Bin chur lai petéte foux dgerainne aïppelaie sés  
trâs aimis po qu'ès venieuchïnt l'édie.

Lo boérèt écâquelaie : « I n'ai pe lo temps ! È fât  
qui alleuche éçhaipaie ! »  
Èt è s'en vait.

Lo tchait dit : « Qué mâ tchaince ! I airait bin  
ainmaie allaie moûechenaie aivo toi, mains i dais  
finit de chlapaie mon laicé, que richque de  
touénaie ! »  
Èt è repaît sains bru tchu sés paittes.

Lo poûe groncenaie : « Çoli s'ré aivu ïn piaigi,  
mains ç'ât lo djoé de mon bain dains lai trouse ! »  
Èt è s'en vait c'ment qu'èl était venit.

Aidonc lai petéte foux dgerainne allaie tot de pai  
lée moûchenaie lés épis de biè.

Ïn còp lai moûechon finit lai petéte foux  
dgerainne devait empoétchaie lo sait de grains de  
biè d'junqu'à melin po lo meudre ét en faire de lai  
fairène.

Bin chur èlle aippeul en l'ède sés trâs aimis.

Lo tchait dit : « I voérôs bin mains è me sanne  
aivoi vu péssaie ène raitte ! »  
Èt èl ât repaitchit sains bru tchus sés paittes.

Lo poûe groncenaie : « Bin v'lantie mains pe  
mitnaint, ç'ât l'hoûere de lai moirande ! »  
Èt è l'ât repaitchit c'ment èl était veni.

Lo boérèt écâquelaie : « Çoli tchoi mâ, i dais  
allaie voûere lo médecin po mai gruatte ! »  
Èt è s'en vait en se balainçant.

Aidonc lai petéte foux dgerainne s'en feût  
d'junqu'à melin tot de pai lée aivo son sait de biè  
ét s'en revint, tot de pai lée, aivo son sait de  
fairène.

En l'hôta èlle pregnait de lai fairène, de l'âve, de  
lai sâ èt de lai yevure po aipparayie sai paîte è  
pain.

Èt bin chur èlle aipeul sés aimis po l'édie.

Lo boérèt écâquelaie ét repaitchait en se  
balainçant.

Lo tchait s'en allaie sains brut.

Lo poûe groncenaie ét repétchait c'ment él était  
veni.

Aidonc lai petéte foux dgerainne pétrat lai paîte  
tot de pai lée, lai léche gonçhaie, èt fait tieûre lo  
pain dains son foué tot de pai lée.

Tiaind lo pain ât aivu tieût, èlle aippeul sés aimis :

Tiu ât-ce que ve m'édie è maindgie mon bon pain ?

MOI MOI écâquelaie lo boérèt.

MOI MOI groncenaie lo poûe.

MOI MOI dit lo tchait.

Mains lai petéte fouxte dgerainne qu'aivait vengnie son biè tot de pai lée, qu'aivait moûechnaie tot de pai lée, qu'aivait poétchaie lo sait de bié à melin tot de pai lée, qu'aivait aipparayie lai paîte tot de pai lée yos dit :

« Djainqu'è mitnaint i ait fait tot de pai moi, aidonc i ve porcheudre ! »

Èt èlle maindgeait son pain..... tot de pai lée !